



Jaishankar-i Iran Foreign
Minister den jembi

Jayden Seales dang pa indang
match fees 15% senchi achi



Tanü Kohima tesem kar nung power shut down alitsü

Dimapur, Aami/June 27 (TYO): Executive Engineer (E) Electrical Division Kohima, Er. Shiludi Longkumer ajanga sangdong ka nung, June 28, 2025 nikongdang 1:00 ako nungi 6:00 ako tashi 11KV Secretariat aser 11KV Thizama feeders along Civil Secretariat Road nung ajungben shutdown alotsü, ta metetdaksüogo.

Tzünglu maneni aruba ajanga alinen aluba mechi double pole structure tesem melenshitsü mechi iba mera ya agitsüsa akumer.

Iba mapang Secretariat Area, Lower Bayavü, Khikha-Rüleizou, Merema aser Thizama nung power supply shibanga alitsü.

Ajisüaka Department-i lateta aliba mapang matongdangsa power supply yanglushitsü merangtsü, ta sangdong ajanga ashi.

Anungji item tesemtem nung aliba consumer ajunga dang kumdanga alitsü mepishir aser department den amalitep akatsü ayongzüker, ta sangdong ajangasa ashi.

Dimapur district nung ILP atema teinyaktsü kar metetdaksür

Dimapur, Aami/June 27 (TYO): Home Department ajanga taoba mapang metetdakja aliba den bendenloksema Dimapur district kübok Inner Line Permit agütsütsü asoshi Deputy Commissioner, Dimapur ajanga sangdong ka agütsüogo.

ILP melen Central/State government employees indang kibong aser dependents atema employee indang ID Card agi peritsü. Register süa aliba Public mesüra private company tem indang Heads tem pei regular

employees indang guarantor ama kuli agütsütetsü, ta ashi.

Guarantor ama Employer certification atema lai/ki kibur nungi kuli agütsüsüla, transit passenger tem dang ILP memishitsü, ta ashi.

Dimapur District atema floating Population kübok anogoshi aayanger atema offline ILP ya tang nungi tenzüka ali/ki/company/firms kiburi guarantor ama kuli agütsüba sülen agütsütsü, ta Deputy Commissioner, Dimapur ajangasa metetdaksü.

Mkg jila nung July 1 nungi Meter Reading aser Bill bendenba tenzüksü

Dimapur, Aami/June 27 (TYO): Wards 18 aliba Mokokchung jila nung Power Department Mokokchung ajanga July 1, 2025 nungi tenzüka Meter Reading aser Collection of Electricity Bill bendentsü, ta Executive Engineer, Electrical Division, Mokokchung ajanga nüburtem dang sangdong ka

nung metetdaksü.

Anungji Electricity Consumer ajungai tashi angatapa Salangtem Ward nung Jubilee Memorial School, Mokokchung tsünglanglen Electrical Sub-Divisional Office nung Electricity Bill agütsütsü ayongzüker, ta sangdong ajanga ashi.



Vidhan Bhawan, Maharashtra nung June 23 aser 24, 2025 anogotem National Conference of the Estimates Committee of Parliament and State/UT Legislative Bodies alidang Nagaland Legislative Assembly tenüng nung Advisor, Soil & Water Conservation and IPR & Chairman, Committee on Estimates, Imkong L. Imchen; Advisor, Youth Resources & Sports, S. Keoshu Yimchunger aser MLA, Dr. Sukhato A. Sema nunger adenba mapang tangokba noksa ka yangi angur.

Nagaland nung World MSME Day 2025 mungogo



Advisor, Agriculture, Mhathung Yanthan den tongtipang nisungtem aser ketdangsürtem Conference Hall, Nagaland Civil Secretariat, Kohima nung June 27, 2025 nü World MSME Day amungdang tangokba noksa nung angur.

Dimapur, Aami/June 27 (TYO): United Nations General Assembly ajanga 2017 küm tenzüka World MSME Day ya küm shia June 27 nü munga arur aser iba mapang employment generation, innovation aser rongsenketzüng ainba nung MSMEs ajanga shilem tajung agiba indang benjonger.

Alima nung business shilem 90 dak tema MSMEs küboki aiter aser global employment shilem 50 dak tema aser emerging economies nung national income (GDP) shilem 40 tashi MSMEs nungi lir.

Nagaland nunga World MSME Day ya June 27, 2025 nü Secretariat Conference Hall, New Secretariat Complex, Kohima nung Department of Industries and Commerce, Kohima ajanga ayongzüka amung, kong sentong akhumdong Advisor, Agriculture, Government of Nagaland, Mhathung Yanthan liasü.

Advisor Yanthan-i iba sentong nung jembidang, agriculture aser horticulture sector nung MSMEs indang entrepreneurial tsütsü nükla tulu aliba indang lemsatapa liasü.

Pai workshops ayongzüksü, scheme balala local oshi nung meyipzüksü aser KVKs aser DICs nung MSME facilitation centres amenoktsü ayongzüka

liasü.

Talisa district tashi jangjateta, clusters yanglua, senotsü bushiba lenmang tesadamba lapoka aser digital marketing temaba jenjangi ajungkettsü ashi.

Paisa danga schemes tem den lungjemtsü, FPOs/FPCs den ka kumer inyaktsü aser tetsür aser lanurtem tashi agütsütsü ayongzüka liasü.

Sentong nung Secretary, Industries & Commerce, Kumar Ramnikant, IAS ajanga 'Raising and Accelerating MSME Performance (RAMP) programme' onük nung ajemdaker jembia liasü, koba World Bank sentong ka lir aser MSME sector tashi itdaksütsü nükjidong nung Government of India-ia yarisemer.

Pai Nagaland nung RAMP programme indang tongtipang inyakyim rateta ashi, kong MSMEs indang capacity building, "Make in Nagaland" inyakyim kübok indigenous products ajungketa market access tajungba kumdaksüba, tajunglen nungi toktepba nung yaritepba, green finance initiatives, takotet nisungtem den sensaksema senotsü aser markets lenmang lapokba aser Management Development Programs (MDPs) aser targeted training sessions ajanga institutional development densema lir.

Nagaland CM-i anogo ana atema Vijayanagar semdanger

Dimapur, Aami/June 27 (TYO): JSW Group ajanga jaokba ama anogo ana atema Nagaland Chief Minister, Dr. Neiphiu Rio tanü Jindal Vijayanagar Airport, Karnataka tongogo.

Saisapong terenlok, industrial collaboration aser sobaliba tesendaktep nung tashi itshitsü nükjidong nung pai iba state semdanger.

Pa Vijayanagar Airport tonga aoba mapang JSW team aser Inspire Institute of Sport (IIS) lenirtemi pela agizüka liasü.

Chief Minister meina Nagaland nungi Abu Metha, Advisor to Chief Minister, Chairman of the Investment & Development Authority of Nagaland, and Vice President of the Athletics Federation of India; Rusemtong Longkumer, PRO to

the Chief Minister; Kechangulie Rio, President, Nagaland Cricket Association (NCA); Benei M Lamthiu, Chairman, Nagaland Super League (NSL) and MLA; Neibou Sekhose, Executive Member, All India Football Federation (AIFF), President, Nagaland Football Association (NFA); Kethosituo Sekhose, Director of Youth Resources and Sports (DYRS); Kuputo Shohe, Chairman, Nagaland State Mineral Development Corporation (NSMDC), Joint Secretary, Nagaland Olympic Association (NOA) aser V. Hibo, OSD Security nungertem oa lir.

Iba mapang parnoki JSW lenirtem den ken o balala jembishinütsü aser Inspire Institute of Sports (IIS) nung Nagaland athletes tem training

Iba sentong nung MSMEs nem resources aser teyari tali agütsütsü mechi RAMP Nagaland Portal semzüka aser department indang website yanglushiba amala tongtipang terenlok lemsatapa liasü.

Maneni iGOT User Manual for Nagaland saya, koba ajanga sorkar mapa inyaker asoshi Integrated Government Online Training platform tajungba nung amshitsü asoshi lenmang sayur.

Nagaland nungi online training aser capacity building atema iGOT portal nung ketdangsür 220 tashi onboard asüba sorkar indang department mezüngbubaji Department of Industries & Commerce ya lir.

Kasa mapang iba sentong nungsa Government of Nagaland aser Quality Council of India (QCI) tsüngta Memorandum of Understanding (MoU) zülutepa liasü, kong QCI tenüng nung Manish Vashistha, Deputy Director, QCI ajanga meyongnem agütsü.

State telunghzüc nung industries and commerce densema sector balala nung quality standards tajungba kumdaksütsü nükjidong nung iba MoU ya zülutepa liasü. Iba MoU ajanga RAMP programme kübok Nagaland nungi MSMEs manufacturing atema ZED aser LEAN Certification tashi itshitsü teimla lir.

Sentong nung Kvulo Lorin, Chairman, Nagaland Industrial Development Corporation (NIDC) menden liasü aser Director, Industries & Commerce, P. Tokugha Sema-i melepzüng o jembi.

Iba sentong nung department ketdangsür, Administrative Heads of Departments aser MSME nungi teshimtet nisungtem dena liasü.

agia aliba semdangtsü aser IIS nung Olympians aser athletes tem den sensaksem akatsü.

Parnokisa Kaladham aser Vijayanagar Steel Plant densema tongtipang industrial aser cultural facilities semdangtsü.

Chief Minister aser par delegation ajanga JSW aser IIS den tarutsü nung terenlok maparen lungjemer inyaktsü, sports collaborations, art residencies aser sobaliba tsütsü inyakyim balala indang jembishinütsü. Pai Nagaland Super League (NSL) youth team den ajurutepa sensaksem akatsü, shirnok tang IIS nung 'high-performance training program' ka agiba mapang lir.

NSL youth team ya June 28, 2025 nü Bengaluru FC densema friendly matches kar asayatsü lir.

Süngkomen Ward Yimden meyong "Arok Kilem" lapok



Hon'ble Advisor Water Resource Department
Wb.Tongpang Ozüküm-i Süngkomen Ward Yimden
meyong "Arok Kilem" lapoktsüdang tangokba noksa.

Mokokchung, Aami/June 27 (TYO): Tanü Süngkomen Ward Yimden meyong "Arok Kilem" Hon'ble Advisor Water Resource Department Wb. Tongpang Ozüküm-i lapoktsüogo.

Nüburtem pei yimtsüng nungi town bushia arua alir aser ibaji ajanga town nung ali angutsü kanga dang tasak, iba ama mapang ka Süngkomen Ward yimden aser ki achaayanga aser committee puri tesem tila ka dang süaka kimong tamshi shia nübur nüngdakba peritsüsa ki tajung ka sütetogo ta Wb. Tongpang Ozüküm-i tenüngsang agüja ashi.

Ozüküm-isa Yimkong ki ka sütetbaji nübur asoshi kanga dang tajangzük lir, anungji iba Arok Kilem nung nübur asoshi aser alima tejakleni aotsü asoshi telemtetba tajung agiang, ta ayongzuka jembi.

Central government, state government aser iba den külemi Urban Local Bodies inyakyim aika dang lir, Naga lima tetsükdaktsü tera aliba ajanga küm 20 shi ULB election magi arur taoba küm agitetogo. ULB election nung adoker Councillors-tem ajanga tanem tanemi ta inyaka aotsü aser iba mapang nung councillors aser Ward yimden teka amteper terenlok mapaji inyaksüla ta paisa Süngkomen Ward ULB nung dena alinung iba olenji süoker, ta Advisor-isa ashi.

India nüchiso ngur 2047 küm küm noklang ka ajung dang developed country kümer alitsü mangdang nung Viksit Bharat sentong atemteter inyaka odagi, anungji asen state-a iba Viksit Bharat dak sentakba nung asen State-a June 10 nü senden tajung ka mena shisa lemsatopogo, anungji iba nungji asenoka temoatsü agitettsüsa

renema alitsüla ta Advisor-isa ashi.

Advisor Tongpang Ozükümisa Viksit Bharat sentong kübok Swach Bharat nung kanga dang temelung agütsüdagi, Plastic agi alima kanga dang janaogo iba ya kanga jungabo menokdangtetsü, saka iba nungi jenbutsü asoshi kanga shisa akatsüla. Viksit Nagaland sentong kübok Süngkomen Ward-ji Nagaland nung mezüngbuba "Plastic Free Ward" asütsüsa inyak nung kanga dang ajungtsü ta adenshia aliba süngkomen ward sanger ayongzuka jembi.

Iba sentong nung Tsüngrem lenisüba jazüka Wb.Marshilu Süngkomen Baptist Arogo Deacon-i sarasademer tenzük, Kichutar Kidong Mokokchung Village nungi aser Wb.T.Lima Kichu Former Chairman Süngkomen Ward aser MMC Councillor parnokia Ralok o jembi, ki asüba osang Construction Committee Convenor Wb. Nunhgshimangyang-i agütsü, ki Meshitet sarasadem Süngkomen Baptist Arogo Asstt. Pastor Matsüng Lkr-i agi aser Süngkomen Ward Yimden nung Executive member Wb. Lanu Pongen-i melepzüng o jembi aser Wb.Merennungsang GB ajanga sarasadema sentong tembangba den Süngkomen Ward Chairman Wb. Yangerjungba ketdangsüba nung sentong achaayanga agia liasü.

Wangpang-i Anganwadi Workers tem nem Smartphone lemtsü

Dimapur, Aami/June 27 (TYO): Advisor for Social Welfare, Government of Nagaland, Wangpang Konyak-i, Saksham Anganwadi & Poshan 2.0 Scheme kübok Jalukie ICDS Project nungi Anganwadi Workers 20 nem Smartphone lemja liasü. Iba sentong ya St. Xavier's Parish, Jubilee Hall, Jalukie Town nung June 27 nü agia liasü.

Sentong nung o jembiba mapang Wangpang Konyak-i ashiba agi, Smartphone lemtsüba dak alia pai Jalukie semdangba nükjidong tongtibangtibaji, tongtibang ken o tem aser department aser talisa district nung Anganwadi Workers temi tetsükdaktsü balala ajangshiba indang osang agitsü atema lir ta ashi.

Social Welfare Department-i humanitarian shilem tongtibang agiba indang jembiba mapang pai office aser staff tem dang pei tata tesem toktsür maotsü aser nendaka inyaksü ajungshi, kechiyong parnoki pei tata tesem metoktsüi yakyaka inyakba ajanga lokti nung temelenshi bener arutsütsü ta ashi.

Advisor-isa, district nung department ketdangsürtem aser

staff tem dang welfare schemes balala takok ngua benoka inyaksü atema district administration den amalitepa inyaksangshitsü ajungshia liasü.

Wangpang-isa, department-i benoka inyaka schemes balala indang yimdaklirtem nem tangazükba agütsütsü koda tongtibang iba indang lemsatop. Pai ketdangsürtem aser Anganwadi Worker tem dang osang prokshitsü ajungshi, ajta asünungdang item scheme tem indang tajangzük ya tekübokba jenjang tashi tonga lutettsü.

State nung old age pension schemes nung bogus entries indang ken o benoka jembiba mapang Wangpang-i, ken o dak sendaka aliba ketdangsür aser Anganwadi Worker tem dang beneficiaries tailatem bushiteta jangjashitsü, parnok tenüng record nungi agintsü aser department nem itashia osang agütsütsü ayongzuka liasü.

Smartphone lemtsüba indang jembiba mapang Wangpang-i, Anganwadi Worker tem mapa temelaba kümdaktsütsü atema dang masü saka ken o kanga junga asadanga mapang shidak nung osang agüja parnok mapa tedangshiba kümdaktsütsü

nükjidong nung iba jenjang agiogo, ta ashi.

Paisa, smartphones agütsür asünung mapa minyakba atema kuli taila agütsütsü kecha lenmang mali, ta ashiba den Anganwadi Worker tem dang iba maongka ya takok tashi agitsü aser maneni tejangraba tulu nung bendanga agüja inyaksü ajungshia liasü.

Sentong nung Secretary of Social Welfare, Yongchingkumla aser Deputy Commissioner of Peren, Hiazu Meru natia o tatsütsü jemba liasü. Advisor meina Secretary of Social Welfare, Joint Secretary aser Directorate nungi tanga ketdangsürtem oa liasü.

Sentong ya Peren DPO, Tsungrosongla Ao-i lokti pela agizükba o jembir tenzük aser CDPO, Jalukie ICDS Project R. Chirhotshu Nyusou-i tepela anküp o jembir tembanga liasü.

Formal sentong agiba sülen Advisor-i, Social Welfare Department, Peren ketdangsür aser staff tem den sensaksem sentong ka ayongzuka agi aser iba mapang pai ken o tem kanga junga angadang aser item ken o tem bentettsütsü tenangzükba agüja liasü.

SANGDONGER

Dimapur Area Aor Ordained Minister Fellowship DABA, Duncan Office nung Chiteni (July) 2, 2025 anepdang 10 am nung rongdak kar jembitsü mensem ayonger.

Sd/-
Rev. C. Walu Walling
Tezülur, DAAOMF.

Estimates Committee National Conference agiogo

Dimapur, Aami/June 27 (TYO): Estimates Committee of Parliament aser State/UT Legislative Bodies indang National Conference June 23 aser 24 nü Vidhan Bhawan Maharashtra, Mumbai nung agiogo.

Iba conference ya Committee on Estimates küm 75ajunba nüngdem nung Committee on Estimates aser State Legislatures mendenpurtem indang Conference ka liasü

Committee on Estimates, Nagaland Legislative Assembly züngsemtem rongnung Advisor for Soil & Water Conservation and IPR & Chairman, Committee on Estimates,

Imkong L. Imchen; Advisor for Youth Resources & Sport, S. Keoshu Yimchunger (züngsem) aser MLA, Dr. Sukhato A. Sema, (züngsem) nunger densema liasü aser parnok den Secretary-in-Charge aser Nagaland Legislative Assembly nungi ketdangsürtemi iba sentong nung shilem agia liasü. Conference mapang Committee on Estimates dak sendakba nung tongtibang onüktem benoka sensak asem. Iba committee ya sorkar department balala inyakyim indang tanüker ama inyaksangshir aser yimsüsüba nung odangtetsüsa aser ochishia inyaksü atema teyar agütsür.

Chozuba nung PMVS kübok toolkit lemtsü

Dimapur, Aami/June 27 (TYO): District Industries Centre, Chozuba General Manager office-i June 24 nü Prime Minister Vishwakarma scheme kübok toolkit lemtsüba sentong ka ayongzuka agiogo.

Sentong nung o jembiba mapang District Industries Centre, Chozuba General Manager Heinamwangbe Narangbe-i ashiba agi, iba sentong ayongzuka agiba nükjidong tongtibangtibaji media atsüa arutsü aser scheme indang

tali metetdaksütsü atema lir.

Pai beneficiaries tem dang parnok nem agütsüba toolkit tem kanga junga anepalua amshitsü mepeshi, koba ajanga sobaliba inyakyimtem wazüka ayutsü, skills arangtetshidaktsütsü aser parnok nem maitsü ka agütsütsü, ta ashi.

Sentong nung Suthuzu Nawe, Ruzazho, Phuhgi, Sekrezu yimtsüng nungi Beneficiaries temi shilem agia liasü. Ajak senteper molok ataksü atema toolkits 24 lemja liasü.

Zunheboto nung UDYAM & FSSAI registration drive agia

Dimapur, Aami/June 27 (TYO): UDYAM & FSSAI registration dak sendakba nung awareness sentong aser registration drive ka June 27 nü Zunheboto jila Youth Hall nung agiogo.

Iba sentong ya shisalen sayur FA, RAMP Phutovi aser Medical officer Dr. Gihuka chishi na lenisüba nung agi. Sentong nung Phutovi-i shishilembartem atema UDYAM Registration ya koda tongtibang aser tajangzük lir iba indang lemastep. Phutovi-isa, UDYAM portal nung züngoksema aliba business temi

MSME Loan amala sorkar scheme balala agitettsü, ta ashi.

Medical officer Dr. Gihuka Chishi-ia, FSSAI registration tajangzük aser temzüng ozüing dak sendakba nung iba inyakyim indang metetdaksü. Chishi-i ashiba agi, FSSAI nung züngoksema ajanga shishilembatsü atema maongka taliba agütsür.

Sentong nung General Manager, DIC Zunheboto Er. N Toky Chishi-i lokit pela agizükba o jembi aser Inspector, DIC Zunheboto, Ikupu Tuccu-i tepela o jemba liasü.

Kohima DC-i tenokdangba agütsü

Dimapur, Aami/June 27 (TYO): Kohima District kübok Sechü Zubza aser Viswema yimtsüng nung African Swine Fever (ASF) putetba sülen Kohima Deputy Commissioner-i, tashidak azüoktsü aser prokshia meyoktsü atema tashidak agi kongshir aliba tesemtem ya Infected & Surveillance Zone ta officially sangdongogo.

Chief Animal Husbandry & Veterinary Services Officer-i June 21 nü sangdongba dak ajemkdaker osang agütsüba nung Sechü Zubza aser Viswema yimtsüng ya Infected Zones ta jangjaago aser tashidak pokteter aliba tesem temeket km 1 mekazüka yuogo. Item tesemtem temeket nung

Surveillance Zone amenokogo aser iba yagi kilometer 10 ayimjemtsü.

Tashidak prokshia meyoktsü atema jenjang agiba mapang osang tejangja magütsü tashi item tenokdangbatem agütsüogo.

1. Item tesemtem nung Ak khenyongi maleptsü

2. Ak aser ak chanu bener maotsü aser bener marutsü

3. Ak aser ak shi belenshiba nokdangtsü

ASF prokshia meyoktsü aser district nung shiruru kümzüka ayutsü atema item jenjangtem agiogo. Nüburtem dang osang tejangja ka magütsü tashi tetuyuba sülen tashi anga anidaktsü metetdaksüogo.



June 27, 2025 nü New Delhi nung DEVI (Delhi EV Inter-connector) electric bus 150 tenzüksüba sentong nung Delhi Chief Minister Rekha Gupta den cabinet minister tem-Pankaj Kumar Singh, Ravinder Indraj Singh aser BJP MP Yogender Chandolia nunger adenba noksa nung angur.

RSS lenir kati linük temzüng nungi 'secular' agientsü jembia

New Delhi, Aami/June 27 (Agencies): Brihostibarnü RSS General Secretary, Dattatreya Hosabale-i linük temzüng okila nungi 'socialist' aser 'secular' agientsü jembiba den külemi küm 50 tejaklen Congress-i Emergency benokba atema aitsü.

New Delhi nung sentong ka nung jembidang Hosabele-i, Emergency mapang Congress sorkari linük temzüng okila nung socialist aser secular inoksema liasü, aser tang tashi iba ya alitsü tim asü, ta asüngdang.

Congress lenir Rahul Gandhi aitsüba olen ka nung pai, "Iba ama inyakertemi tanü linük temzüng kaket amer jajar. Tang tashi parnoki tatok memeshir. Nenok mezüng lenirtemi ibaji inyak, anungji nenoki linük nüburtem dang tatok meshitsüla," ta ashi.

Emergency mapang nung nisung meyrjang aika jail nung puoka reshikangshia liasü aser judiciary den media temeden nokdanga liasü, ta pai ashi.

RSS leniri jembiba oji aija Congress party lenir Jairam Ramesh-i X ajanga, "RSS-i India linük temzüng kodanga magizük. RSS-i Dr. B.R. Ambedkar aser Jawaharlal Nehru na densema linük temzüng yanglurtem anema liasü," ta ashi.

Paisa, Manusmriti nung ajemdaker linük temzüng meyangluba agi RSS-i yimjak nung odiodia linük temzüng aija liasü, ta ashi.

"RSS aser BJP-i linük temzüng tasen yanglutsü atema takhangba agütsü. 2024 küm Lok Sabha election nunga Modi nüboyim nung iba atema jembia liasü. India nüburtemi ibaji

magizük," ta Jairam Ramesh-isa metetdaksü.

Hokolbarnü Congress lenir Rahul Gandhi-ia, "Maneni RSS tebilemba jungkai adokogo. Linük temzüng ajanga parnok jashir, kechiyong linük temzüng nung kasa züngshiba, secular aser ochi temeden indang shia lir," ta metetdaksü.

Rahul-i X ajanga, "RSS-BJP-i linük temzüng maginer; parnoki Manusmriti aginer. Parnoki sensakertem temedem agienadokner aser tanaben alar ama kümdaktsüner. Parnok tebilembaji, tashi tulu aliba temzüng agientsü atema lir. RSS-i iba mangdang mayutsüla. Onoki kodanga parnok nem takok mengudaktsütsü. Linük meimer India nunger ajaki tasünü tashi linük temzüng atema nokdaksü," ta ashi.

Mapa bushia Russia-i aoer India nunger 14 samaogo: Congress

New Delhi, June 27 (Agencies): Hokolbarnü Congress-i, India nunger 14 mapa bushitsü atema Russia-i ao saka samaogo, ta shia sorkar dang parnok kümzüka anir arutsü atema Russia ketdangsertem den tongtepratepa inyakang, ta takhangba agütsü.

Osangbenertem den jembidang Punjab Congress Tir, Amarinder Singh Raja Warring-i, India nungertem Russia nung samaba sülen küm ka ser tesadang süiogo, ta metetdaksü.

Warring-i, "2023 küm December ita nung nisung 126

mapa bushia bendangleni ao. Parnoki Singapore, Malaysia aser Italy-i onüa liasü saka Moscow-i anir ao. Kü medemer Jagdeep-i kü dang yamai ashi, par adianu ka den tangar nisung pezüi agents nem sen 31,40,000 agütsür Russia-i ao saka parnoki mapa mangu. Item nisungtemji Russia sorkari sepai nung shimok," ta metetdaksü.

Parnok 126 nungjagi 100 bo meyipa aruogo, ta pai ashi.

"Nisung 14 samaogo aser kü ket nung parnok tenüng, numbers aser osang aika lir," ta Warring-isa metetdakja tenüng list ji sayu.

"Samaba India nunger 14

nungjagi parnok 9 Uttar Pradesh nungi lir, nisung asem Punjab nungi, ka Maharashtra nungi aser ka Jammu & Kashmir nungi lir. Iba otsü ya Modi indang 'Amrit Kaal' otsü lir," ta Punjab nungi Congress MP, Warring-isa ashi.

"Anungji onoki Union sorkar dang ya asüngdang - nenoki parnok kümzüksü asü? Nenoki Russia dang, kechiba India nungertem sepai nung shimok, ta asüngdangtsü asü? Russia sorkar den amalitepa inyaker agents anema nenoki inyaktsü asü? Onoki tasüngdangba ajak atemaji telangzüba aginer," ta paisa ashi.

Noida nung Old-Age Home ka nungi teintet senso 39 kümzüka

New Delhi, June 27 (Agencies): Uttar Pradesh state kübok Noida yimti nung teintet senso 39 kümzüka, ta ketdangsertemi metetdaksü.

Old age home nung aliba kanga teintet sensotemji kar süoshi agi alener liasü, natzü aser scü agi parnok süoshi ajak menener liasü.

Iba tiaji anguba sülen ketdangsertemi old age home ji shibangtsüogo.

Uttar Pradesh State Women's Commission aser Noida police nati senteper Brihostibarnü Noida kübok Sector 55 nung aliba old-age home ji mita aodang teintet senso 39 ji kümzüka sülen sorkari lapokba old-age home kati anir ao.

Uttar Pradesh State Women's Commission nung züngsem, Meenakshi Bharala-i, Commission aser police-i mita aoba mapang nung kanga tantsür ka süoshi agi alener angu aser kanga tamburtem aika takdang tamajung nung lia angu.

Old age home nungji tantsür ka süoshi agi alener aliba video ka social media nung prokshiba sülen ketdangsertemi old age home ji mita ao.

Old age home nungji tetsür kati la nurse lir ta ashi, ajisiüka asüngdangyaba ajanga laji nurse masü saka class 12 pass asür ka dang ta bushitet.

Old age home nungjisa teintet sensotemji anepalua reprangtsü atema staff tem maliasü.

Jaishankar-i Iran Foreign Minister den jembia

New Delhi, June 27 (Agencies): Hokolbarnü External affairs minister, S Jaishankar-i Iran Foreign Minister, Seyed Abbas Araghchi den phone ajanga jembidang Israel aser Iran na tsüngda raraba mapang India nunger anir aruba maparen nung yaritepba atema pa dang pelaba lemsatsep.

Jaishankar-i X ajanga, "Tanü nikongdang Iran Foreign Minister Araghchi den jembigo. Pai Iran tangatetba aser tang tensa dak sendakba nung tangatetba lemsatsep," ta metetdaksü.

"India nunger kümzüka anir aruba maparen nung yariba atema pa dang pelaba lemsatsepogo," ta Jaishankar-isa metetdaksü.

Ano tanga osang ka nung, Hokolbarnü New Delhi nung osangbenertem den jembidang Jaishankar-i, China nung ayongzüka Shanghai Cooperation Organisation (SCO) Defence Ministers senden nung defence minister Rajnath Singh-i külem sangdong ka nung sign masütsü telemtetba agibaji tim dang, ta ashi.

Jaishankar-i, iba document nungji kiralongrartemi Pahalgam amakba indang shia maliba agi Rajnath-i sign asütsü

memelung, ta ashi.

"SCO ji ajaki melungtepba nung ajemdaker aoer. Züngsem linük kati danga magizükra kecha tejakleni aotsü makok. Rajnath-i, iba document nung kiralongra indang melira onoki sign masütsü ta ashi," ta Jaishankar-isa metetdaksü.

Israel aser Iran na tsüngda rara tenzüka sülen India nungertem linük ana nungjagi kümzüka anir arutsü atema India sorkari June 18 nü Operation Sindhu tenzüka liasü. Operation Sindhu kübok Brihostibar tashi nung tayimtsü 19 ajanga Israel aser Iran na nungi India nunger 4,400 dak tali anir aruogo.

Operation Sindhu dak sendakba nung tasüngdangbatem langzüdag MEA otongdar, Randhir Jaiswal-i, India-i tang tensa asadangdar, aser iba nungji ajemdaker telemtetba agia inyaktsü, ta metetdaksü.

Operation Sindhu kübok tang tashi nung Iran nungi India nunger 3,400 dak tali anir aruogo aser aser Israel nungi 818 anir aruogo.

Operation Sindhu kübok mezüngbuba tayimtsü nung India nunger 110 Armenia yimtiba, Yerevan nungi New Delhi tonga anir arua liasü.



June 27, 2025 nü Patna nung osangbenertem senden ka nung RJD lenir Tejashwi Yadav, Bihar Congress Tir Rajesh Ram, party lenir Pawan Khera aser CPI (ML) Liberation General Secretary Dipankar Bhattacharya nungeri jembidang tangokba noksa nung angur.

GOVERNMENT OF NAGALAND
MOTOR VEHICLES DEPARTMENT
OFFICE OF THE TRANSPORT COMMISSIONER
KOHIMA - 797004, NAGALAND.
E-mail: commtrans-ngl@nic.in

TC/PRO-2/IRTS/2021/ 1781-82

REQUEST FOR PROPOSAL

Nagaland, 27th June 2025.

In pursuance of the approval conveyed by the Government vide letter No.TPT/MV/06/25/37 dated 20th June 2025, the Motor Vehicles Department, Government of Nagaland, seeks proposals from intending reputed Firms / Agency/ Company for **Selection of a Consultant for Providing PMU and Consultancy Service for developing an Integrated Road Safety Solution in the State of Nagaland.**

SL No.	Name of RFP
1.	Selection of a Consultant for Providing PMU and Consultancy Service for Developing an Integrated Road Safety Solution in the State of Nagaland

The detailed Request for Proposal(RFP) documents containing information on eligibility, dates and timelines required formats etc. shall be available on the website <https://mvdnagaland.in/> from 28.06.2025 onwards.

Sd/-
ELIAS T. LOTHIA
Transport Commissioner
Motor Vehicles Department.



TIR YIMYIM YIMOBILEM (EDITORIAL)

DIMAPUR

KÜPTOKNÜ

AAMI 28, 2025

Mozümora achiba tebilemtsü

Nagaland nung mozümora achir nisung lakh trok dak tali lir ta asadangtetba osangji asenok ajak asoshi tajung tazü osang ka masü, ibai taoksatsü aser kanga shisabolutsüba osang tamajung ka lir. Nagaland nütsüng yongsük ajak agi lakh 20 shi dang sükdangteter aser item rongnungji Naga nunger masüba tsümartema aika dena lir aser Naga nungersa asüyonga talila zülüokbatema aika alitsü, kechiyong asenoki election nung takkok angutsü bilema electoral roll nung vote agütsütsü pur aika zülüoktettsü atema nütsüng yongsük aika sayutsü meranger. Anungji, kodang asenoki jungjunga bilemdangdir, ashiko, Nagaland nung Naga nunger nütsüng yongsükbo lakh 12 shi dang asütsüa akok. Aji oda, Nagaland nung ozüngi memelaba temesepba mozü tapu balala achir nisung lakh 6 dak tali lir süra, iba jagi Nagaland nung nütsüng yongsük tesadang ka dak talii mozü achir ta sayur. Ashiko, item mozü achirtemji mazüng memetet mesüra mapa mangu nemzünembonga senzürtem dangbo masü saka yimten yimsüsüba aser ketdangsüba nung nübortem asoshi khuret bena alirtem aser arogo nunga lenirtem dena alitsüa akok. Aji oda, alima ka nung alir nütsüng tesadang kati mozü achir aser tanüngba tesadang ka rongnung ano tesadang kati yi ajemer ta süra, iba limajibo tesamalen aroer asütsü. Atangji, mozümora achir taküm aser kibongji temeimsüka, parnoki melenshitsü meranger saka makoker. Aji oda, pei inyakba agi pei nüngdak meperir aser pei takümü lokti aser arogo nung amshitsüla masü akümer. Tanü putu nung asenok rongnung yimten aser lokti anitsü nübo tajung mengutetba aser talisa arogo nung tenzüker asütsü tetemsü nübo mengutet, mashi ka shimer inyaka aodang ochimashi aser tashimait adoka timtem, takoksa aser maksü ajurubaji mozü aser yi nem nütsüng tesadang ka dak nungi tali kokdaksür aliba agi ajuruba timtem asütsü. Aji oda, kadamasü, maliba shimtsü masü talirtem rongnungiang shimtsü asünungji, lokti aser arogo nung tenzükertem rongnunga kar mozümora achir aser kar yi ajemer ta peisasa achiajem nungi azüoka alirtem dang nungibo mazüokertemang teimba ser aoba agi, tanü asenok rongnung shibai shiba azüoktsü aser shibai shiba sayutsüar mejangjatetika kümogo. Iba ama tia nung, kibong aika nung tsüraburtem dang nungibo lanurtemang tazüokba aser tajungba lia aoba angur. Iba tia ya kodang jungjunga bilemdangdir, Nagaland nung mozümora aser yi agi nütsüng tesadang ka dak tali taküm raksadaksüba timtem aser takoksa ya lanurtem dak nungi masü tsüraburtem dak nungi tenzükbareprangtettsü. Asenok tsüraburtem aikati mapa meinyak ser ochimashi len nungi aruba rongsen agi kibong mesür, anungji taküm lia aotsü asoshi asenoki tanurtem dang meranga inyaka mesayur aser tajungshia majungshir. Aji oda, mozü achir shiaji kibong kaka nungi adokba jala jabaso kaka lir, itemji teimbaka mesayu chirtem asütsü., kechiyong asenok tsüraburtem aikati asen chirnurtem taküm libaliro nung peisasa azüoka alitsü asoshi sayutettsübaji arogo mapa aser school-i yokba agi parnokji ajungtsü amai bilemer. Atangji, tanurtem tajung kümdaktsütsübaji arogo aser school nung tesayurtem khuret lir. Ajisüaka, arogo aser school nung tesayurtemi asen tanurtem bushia oogibo mesayutettsüa akok, parnokji aika oa sayur masü taru atartem lir. Ibaji dang masü saka asenok tanur aser tsüraburtemji arogo aser school nung tesayurtem denji alir masü saka kibong nungang külemi alir, anungji tsürabur kati tsürabur khuret meteta peisasa azüoka alitsübaji pei kibong nungi tenzüksü aser kasaji tanur shia tajung akümtsüba shisatsüjia pei kidang pei tsüraburtem nungi ajizüksü. Atangji, ozüng memelaba mozümora dang masü saka ozüngi memelaba mapatem mita nokdangtsü asoshi government lir saka government nung inyaker mitkartemjia teindang aser pei lima meimba kibong nungi adok mesüra parnoki ozüngi memelaba mapatem nokdangtsü melen ozüngi memelaba mapatemang inyaknitsü. Aji oda, Nagaland nung mozü, yi aser ochimashi tongpang koktettsü atema kibong shia ozüng ashi angaba aser mapa inyaker chiyongba kibong kaka asütsü nüngdaker.

OLEMSABANG

Naga nunger ya azümesen saka chidiyungdiba kin lir

L. Kika Pongener

(Yashi adok nungi...)

Temalen shisemba ama asen Naga nungeri kanga junga mebendangtetba kaji...Alima nung nisunger taginubatemji (Wants) shir meshima aika dang lir, saka item ajakjibo kibong ajak atemabo nungdak masütsü akok. Tatishitsü agi...Senti-oset 'Luxury Goods' etc. Shirnok kaa-ita, pei kibong peria chiyunga-jemer, kibong nungdak ajak perir, tarutsü atema senotsü rizünga yur, ano talila anunger...Item kibongtem atemabo senti-oset ajakji akatsü nungdaker. Ajisuaka, itasen tila agi ariana kibong mesua alir, mesura aayanga alir kibong kati, takar-tulur akaba senti-oset ajak akatsü merangra...Saka ariana tanü poksung dang alir aser tanüngba tera-kata malir ta sura...Item kibongtem atemabo senti-osetji, ashiko, menungdaksü sudi....Mesura makayonga odang litettsü.....Ajisuaka, item oset ajakji akatsü merangra, tangar dang sen apoer alitsüsa akümtsü, aser idangji tip külen tapok apatsü, aser iba tapokji ateptsü atema, ano tip külen sen tetemlok agi apotsüsa akümtsü...ta asüadang, memeteti kibongji sensak tiai ayitsü. Oset karbo iba osetji makanungbo kibongji melitettsüba (Needs) karbo lir....Saka oset karbo iba osetji makayonga kibongji odang litettsüba (Wants) karbo lir....Aji oda, iba anaji bendanga angatettsüla. Anungji asen kibong jenjang asadanga asen kibong jenjang den putepa libaliro shia lira sensak tiai mayitsü.

Ajak dak alaka, kibong/taküm kangabo timtem meli-i alitsü atema, azümesen mesui mapa meranga inyaksüla. Shirnoki azümesen mesui mapa meranga inyaker, parnokji takarsa masüyongjia, timtem kangabo meli-i, pei kibong sasep anisungzüka alitsü. Tanü putu nung teka nung senotsü makara kibong/taküm talitsü kangasa tasak kümogo. Tsüngrem o-i ashir..."Züsenba ajak nung tajangzük lir, saka tebang agi jembiba agi dangpo anung-apung dang tendaktsür" (A.Shin-14:23). "Anualemba teka agi sensak atener; saka teinyak teka agi takar kümdaktsür" (A.Shin-10:4). Aji oda, azümesen mesui meranga inyakra tepok sunga chiyunga-jema alitsü, saka kecha maka yur, o tulu-lu jembia, amajok nung mapang endoka kazüba agibo sensak dang atentsü. Meja (Ant) ya sangnu tila ka lir....Saka Meja yagi mapa meranga inyaker. Meja yagi azümesen mesui meranga inyaka chiyungtsü bendena rizünga ayur, ibajagi küm piyong anisungzüka chiyunga-jema alir. Tesasatsüka, asen Naga nunger kibong aika tangar dak dang nendaker/metaloker meshimetsüa aliba kibong aika lir.

Anungji asenoki mapa meranga inyaksü Meja (Ant) dang angazükdi. Tsüngrem o-i ashir.... "Oh azümesen, na Meja dangi oang, la yimya bilemdangang aser shisa kaang"...."Oh azümesen na kopika mejangtsü ? Na mejangba nungi nai kodang saaktsü ?" (A.Shin - 6:6 & 9). Asen Naga nungeri chidiyungdiba ya azüoktsüla, kechiyong chidiyungdi agi sensak tiai idaktsür. "Yi-pur aser chidiyungdi rongnung teli; Kechiyung yi-pur aser chidiyungdirji sensak tiai aitsü" (A.Shin-23:21). Tanü putu nung sensaker/tilar talitsü kanga tasak kümogo, sensaker/tilarbo lokti nunga kecha jenjang maka aser sensaker/tilarbo adianu aser tembar-ia sentoker. Atangji, tanü putu ya sensakerbo shingaia mezüngshiba lima ka kümogo..."Sensaker pei kiyonger-ia sempar; Saka takar tembar aika lir" (A.Shin-14:20). "Rongseni tembar aika akümer; Saka sensakerji pei tembar nungi pilar" (A.Shin-19:4). Anungji asenoki azümesena meli-i mapa meranga inyakdi aser chidiyungdi nungi pilaa lidi.... Ajioda, sura asenok takarsa masüyongjia kangapo sensaka timtema malitsü.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Pastor kati tesüiba küm ana tashi Kangki apur sayutsüngia senzü



Pastor Nick Schindler

June 27, 2025: Pastor kati tesüiba küm ana tashi touzük pound 75 (kg 34) Kangki ka apur United States tesem balala sema sayutsüngia jajaba sülen tan hopta linük yimtiba, Washington tongogo.

Tan hopta Pastor Nick Schindler-i Kangkiji apur White House kima tonga ao. Linük tesem balala nung pai tangartem den külemi sarasademba den külemi Tsüngrem külem aser Khrista osangtajung sayutsüngia jaja.

Pai US Tir, Donald Trump ajurua linük tesem balala nung ki malirtem tebilemtsü onük lemsateptsü imlaa liasü.

Tesüiba küm ana tashi Schindler-i jilatam aser yimtitem nung Kangki apur sayutsüngia jajabaji osangkakettem, radio, television aser social media nung kanga prokshiego.

Pastor Schindler-i Kangkiji White House kikümbang anasa ayuba sülen ministry site ka semdangba yangji sarasadema Tsüngrem külemtsü tebilemba liasü.

White House kima arrshi küm 40, Schindler-i, "Ni iba Kangki menungratsü. Iba Kangki matsüngdang nisung aikati tepela aser tejashi nüktzü yimogo," ta ashi.

"Iba ya süng ana angentepba dang masü saka ni ama mori ka ajanga Tsüngrem taneptsüba tashi sayuba kuli lir. Iba Kangki ya kü shilem ka kümogo aser ni-a iba Kangki shilem ka kümogo," ta pai ashi.

2023 küm June 23 nü Schindler-i mezüng iba Kangki yangluba sülen Bend, Oregon nung Kangkiji apulok tenzüka liasü.

Pai linük tesem balala sema Khrista osangtajung lemsatepa jajaba den külemi state 11 nung yimtenren lenirtem aser sensotem den ki malirtem tebilemtsü onük-a lemsatepa liasü.

"Nibo mapang shia Kangkiji yur anisüngzüktsü mapang

angu. Ajisüaka Yisuibo anisüngzüktsü atema mapang mangu. Azü ayimba agi Pa tenük nembanga liasü aser tzüraseta liasü. Pai anisüngzük nüngdakba mapang nung Pa dang taochi mesayu," ta Schindler-i ashi.

Trinidad, Colorado nung pa leniba nung nisungtemi Tsüngrem dang asentenshi milak yokang, ta nüktzü yima sarasadema liasü.

Redemption Railroad Ministries tentetsang, Schindler mapang ka nungbo telongpo-ret raksaba agi ajok amer jajatsüsa aküm.

Pa-a arrshi küm 18 asüba mapang nungi tenzüka küm pongu tashi talidak makai liasü.

2019 küm tashi nungbo Tsüngremi pa nem ki ka moatsüba sülen pai food truck ka alia ki malirtem nem chiyungtsü agütsüba den külemi Khrista osang lemsatepa liasü.

Iba mapang nungjagi tenzüka Schindler-i linük nung ki malirtem jenokdakbaba camps aika nung sentong ayongzüka Khrista osangtajung lemsatepa liasü.

Ki malirtem tebilemtsü pungbadaksütsü atema pai yimtenren lenirtem aser Arogo nung lenirtem aika den pa tebilemba lemsatepa aruogo.

Mapang ka nungbo Senator, Mark Pody-i pa Tennessee Statehouse nung jaokba sülen Senate züngsemtem nem metetpelaja liasü.

Oklahoma nung tanur asem tetsü kati Facebook nung Schindler-i Kangki apur jajaba anguba sülen lai pa ajurutsü atema ao.

"Ni pa ajurutsü nüngdak, ta ni ajungmesoa liasü," ta Wendy Dukes-i ashi.

Tesülen lai Tulsa nung lar Arogo nung pastor aser Schindler na metetpelaja liasü.

Twin Falls, Idaho nung baptitsü tebilemba alir tetsür ka Schindler dangi aruba sülen pai Snake River nung parnok baptija

liasü.

Mapang ka nung pai Kangki apur anogo piyong jajaba sülen Tennessee nung aliba Arogo tilakati ao, aser Tenla kimaji pa aonung ayiptsü atema süki meyanga liasü. Ajisüaka Pastor Tony Hayes-i First Baptist Church nung pa indang office nung pa anisüngzükdakja liasü.

"Linük tesem ajaklen ni pastor aika ajuruogo. Parnok karbo Khristmas anogo nung tanurtem ama liasü aser karibo ni tsübua liasü," ta pai ashi.

Mapang kaka nungbo pa melen mile 1 dak tali Kangki aputsür nem pai dollar sen noklang kaka (\$100) agüja liasü.

Raton, New Mexico nunga Yisu dak mamanger kati dollar sen 100 (India nunger senbo 8,400) aazüktsü atema Kangki aputsütsü melunga liasü. Tena külemi jajaba mapang nung Schindler-i pa den Yisu Khrista indang lemsatepa liasü. Mile tesadang shi jajaba mapang nung Tanela Temeshi ajanga mapa inyaka lanursangji aoksa amenba sülen Yisu Khrista nem pa taküm bendanga agüja sarasadema liasü.

Schindler-i Kangki apur sayutsüngia jaja tenzüka sülen tan hopta küm ana jungogo.

"Ni apusodang tenzüka nisung amato masü. Tsüngremi ajungba ni kuli nguogo, Pai sayatenya inyakba aser taküm aika kongshiba ni nguogo. Yisu ya atangji shidak dang masü. Yisui kü den külemi jaja aser Pai ni aser Kangki apua liasü," ta Schindler-i ashi.

Virginia nung temeshi Amongnü amongba sülen Schindler-i ano Kangki tasen ka yanglua tanaben Oregon-i aotsü. Len tom nung pai Mississippi ayong nung anena ayong tzüküm anatsülen sarasademtsü.

Schindler-i, "Oregon nung asentenshi milak jangrutsü, ta Kibubai kü dang shiogo," ta metetdaksü.

ANOGO ABEN TSÜNGREM DEN

Koya Aritepba

"Shibai atem aser shibai tzü aen tenaji ka dang, saka pamok nisung shiai pei mapa yari sempet angutsü" (1 Kor. 3:8)

Khristan tenzükba nung tenzüker aika aliba ishika aliba züngdangteper. Iba ama koya asemtepba mapa Khristan tenzükba mapa nung malitsüla. Asenok asüküm nungi kümzüktsü asoshi Khrista kangki-i asenok taküm nung mapa inyakdaksütsüla. Tejen aser Tasen Lai anaprongla nung masükümstsüla ta kümdangshidaktsür. "Anungji zülua aliba ama, shibai ulur pai Kibuba nung uludakjang" (1 Kor. 1:31). "Kibubai yamai ashir, shisa akar nisungi pei shisatsü nung asü teküm, mesüra tashi tulu nisungi pei tashi nung asü teküm. . . . Temeim, yimlibilem 0 bendang aser temeshiba inyakbaji ni Kibuba lir: item nung ni pelar" (Yerimia 9:23,24). Yangi shisatsüji tenzükba mapa nung asameyang tajung amshiba, mapa meranga inyakba aser asen sen amshiba tsütsü jembiba lir.

Yohan 4: 1-3 nung kodang Farisitemi Yohan dangbo pai nütsüng timba kümdaksüba aser baptitsüba angashi, pai Yihuda toktsür Galilee tanaben meyipa ao. Teinyakba ka dang lepshia meinyaktsü asoshi Pai ya inyak. Pauli kasaji inyak (2 Kor. 10:13-16).

Tajung nung toktepba juni. Iba nungi asenoki kati ka nungi angazüktsü akok. Tangar takok nung pelateptsü aseni angazüktsüla (Rom 12: 15). Tenük merema toktepba indoktsüla. Ibaji Khristan mapa masü.

" Kibuba, Tajung nung toktepba tanela kü dak adokdakjang."

Madras HC-i kiojentem sarasademba hall ama mamshitsü tuyur

June 27, 2025: Madras High Court-i, sorkar ketdangsertem dang nungi temelaba makai nisung aliba kiojentem 'prayer halls' ama mamshitsüla, ta tetuyuba agütsü.

Pastor kati par kiji sarasademba hall ama amshiba agi ketdangsertemi par ki shibanga yutsüba sülen pai court nem temepishiba ken o agüja liasü.

Tiruvarur district kübok Kodavasal nung pastor L Joseph Wilson-i mepsihiba ken o angadangba mapang nung Justice N Anand Venkatesh-i, nisung aliba kiojentem sarasademba hall ama mamshitsü obendang agütsü.

2024 küm jurisdictional tahsildar-i pastor ki shibangja liasü, aser iba kidangji sarasadem sentongtem magütsüla, ta tuyua liasü.

2007 küm pastor Wilson-i Word of God Ministries Trust tenzüka liasü. 2023 küm pai kiojen ka alizükba sülen iba mapang nungjagi tenzüka pai par kidang sarasadem sentongtem ayongzüka agir. Sarasadem sentongtem nungji par kibong züngsemtem, kinüngertem aser kiyongertem adener.

2023 küm nungjisa pai ki kibur nüngja agi Word of God Ministries Trust ta amshia liasü.

Iba kiojen nungji mapang shia tamangertem adenshia sarasadem sentong agibaji kari

ashishi. Iba sülen police-i bushisüngdang tenzüker.

Tesülen Wilson-i kasa kimong nungji Tenla ki asütsü temepishiba agütsü saka magizük. Ibaji dang masü tahsildar-i iba kidang sarasadem sentong agiba anenang, ta tuyua liasü.

High court nung ken o angadangba mapang nung pastor Wilson-i, tang nungibo iba hall nungji loudspeakers mesüra microphones mamshitsü, anungji sarasadem sentong agütsü temelaba agüjang ta mepishi, saka Justice Venkatesh-i magizük.

Justice-i, "Loudspeakers aser microphones mamshitsü, ta ashiba jagi dangbo meperitsü. Nisung aliba kiojen ka nung sarasadem sentongtem ayongzüka agütsü makok," ta ashi.

Justice Venkatesh-i, "Prayer hall nung sarasadem sentongtem ayongzüka agütsü atema tim ozüngtem nung ajemdaker ketdangsertem dang nungi tama temelaba meshitsü nüngdak. Anungji temepishiba ken o benoksangji temelaba makai kiojentem prayer hall ama amshitsü makok," ta metetdaksü.

High court-isa tahsildar dang Wilson'er kiojen shibangja alibaji tanaben lapokjang ta tuyu, ajisüaka pastor-i iba kiji sarasademba ki ama mamshitsüla, ta metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tepiyong

(adj) songtema, tetenzük nungi tatem tashi (whole, entire)


* Anogo tepiyong onok senden mena liasü.

Tepjitepjir

(adj) temang meshitak, retreter (feeling not so well, heaviness)

* Temang jangra matem tepjitepjir asüba agi tanü ni mapai mao.

OLONG PAITEP # 7193



TIPLIN

2. Tetendangba - 8
6. Rajem - 7
9. Naro sükzük - 4
11. Acha-ayanger - 7
13. Mit adok / Jashi - 4
14. Yimli sayutsü ashi - 7
17. Süngsang - 8

LANGTSÜNGLEN

1. Te _ _ _ _ n - 4
2. Tepungba masü - 5
4. Tashi balaka - 3
5. Masü lir - 5
7. Alima nung mali - 4
8. Temela masü - 5
10. Tango sashiba shilem - 4
12. Kanga mejungi aküm - 5
15. As _ _ _ _ ü - 4
16. Jenjang aketba yin - 3

OLONG PAITEP # 7192 TELANGZÜBA

TIPLIN :

1. Kasa, 6. Rangben, 7. Mait,
9. Poktet, 11. Ati, 13. Atasa, 16. Rür,
17. Rajang, 20. Lanu, 24. Nüngjem,
25. Sürä.

LANGTSÜNGLEN :

1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita,
10. Tar, 12. Tinu, 14. Salem,
15. Aja, 18. Anünü, 19. Taju, 21. Ano,
22. Onü, 23. Kua.

NAI-A YA METETTER MA



Assam: Anogo 16 sülen ONGC-i gas leak asüba nembangogo



Guwahati, Aami/June 27 (Agencies): Union Minister for Petroleum and Natural Gas, Hardeep Singh Puri-i Hokolbarnü sangdong ka ajanga, Assam kübok Sivasagar district nung crude oil well ka nungi gas leak asüba anogo 16 sülen Oil and Natural Gas Corporation (ONGC)-i takok ngua nembangogo, ta metetdaksü.

Gas ya June 12 nü nungi tenzüka Barichuk, Bhatipar kübok Rudrasagar oil field nung Well No. RDS 147A; Rig No. SKP 135 nungi leak süa liasü. Iba well ya SK Petro

Services-i achaayanga liasü. SK Petro Services ya private firm ka aser parnok nem state meyong ONGC-i contract agütsür inyaka liasü.

Union Minister-i ashiba agi, gas leak asüba ya June 27 nü 11:15 ako nung nembang liasü, aser iba mapang nisung yiruba, asüba mesüra mi adokba lendong kecha maliasü. "Tekümzüka kübok takaratiba nung iba mapa takok ngua inyakogo," ta Puri-i X ajanga metetdaksü.

Pai iba mapa takok ngua inyaktetba atema ONGC indang crisis management team

asert international well control expert tem nem tenüngsang agütsü. "Sentong kanga junga yanglur mapa benoka inyakba ajanga tetsükdaksütem bentettsü atema team kanga temsüa aliba sayur," ta pai ashi.

Kümdangshia alitsü atema iba tesem anasa aliba kibong 350 shi gas leak asü tenzüka sülen anina liasü.

Minister-isa, iba inyakyim benoka inyakba mapang teyari agütsüba atema Assam Chief Minister Himanta Biswa Sarma aser state administration dang kanga pelaba lemastep.

Sikkim nung sorkar tenzükertem dak temesepba mozü tendangtsü

Gangtok, Aami/June 27 (Agencies): Sorkar tenzükertem temesepba mozü achiba nokdangtsü atema Sikkim sorkari jenjang tesashi ka agidar. Chief Minister Prem Singh Tamang-i ashiba agi, department ajak nung ajungbena temesepba mozü tendangtsü. Sorkar tenzüker kar danga temesepba mozü amshiba ngutetra mapang nungi anentsütsü, ta pai tekümdangtsü metetdaksü.

"Temesepba mozü amshiba ajanga lokti menentsürtem asoshi public service nung kecha jenjang mali," ta Chief Minister-i Gangtok nung state-level sentong ka agiba mapang ashi. Iba sentong ya International Day Against

Drug Abuse and Illicit Trafficking anogomung nüngdem nung ayongzüka agia liasü.

Sikkim nung temesepba mozü achirtem timba küma aoba anema raratsü asoshi sentong aliba nung iba osang sangdongba ya shilem ka liasü. Manan Kendra nung o jembiba mapang Tamang-i ashiba agi, sorkar tenzükertem ochi shidaksütsü aser khuret angatetdaksütsü nükjiodng nung iba jenjang agir.

Iba sentong ya Social Welfare Department-i ayongzüka aser Speaker MN Sherpa, Deputy Speaker Raskumari Thapa, Social Welfare Minister Sanjeet Lepcha, ketdangsür tejentem,

tesayurtem, NGO, volunteer aser kaketshirtemi shilem agia liasü.

Tamang-i ashiba agi, temesepba mozü achiba ya lokti nung tebilemstü tulu ka lir. "Ya talangka pila or mali- iba ya asen kidang aser kiyong nung lir aser iba ajanga asen tarutsü lendong nung toktsür," ta pai ashi.

Paisa, kibongtem, school tem, police aser lokti tentet balala dang iba tebilemstü bentettsü atema longjemmer inyaksü ayongzüka liasü. Pai, lanurtem dang libaliro tajung beshitsü ajungshiba den temesepba mozü achirtem shirnoki toktsüner parnok nem sorkari teyari agütsütsü ta tenangzüka agütsü.

Manipur: Imphal aser Silchar na tsüngda NH-37 anenbang

Imphal, Aami/June 27 (Agencies): Hokolbar anepdang Manipur nung Noney district kübok Luwangchung aser Ramkhul yimtsüng na tsüngda National Highway-37 nung anentsüh aluba sülen Jiribam ajanga Imphal aser Silchar na sendaktepba lenmang ya nokdangogo aser lenmang anatsülen garitem taolen makai anendena lir.

Ketdangsürtemi ashiba agi, tzünglu maneni aruba sülen anentsüh ya anepdang 5 ako shi

nung alu aser lenmang meter 50 shi anenbanga liasü. Anentsüh agi kongshir aliba yimtsüngtem nung ya Zeliangrong Naga nungertem alir.

Anentsüh aluba sülen Jiribam ajanga Silchar nungi khu bener aruba garitem aser Imphal nungi Assam-i oya aliba gari tazüngtem tejakleni moteti anendena lir.

Iba lenmang anepaluba company ABCI indang machinery temi lenmang merketet tenzükogo, ajisüaka mapang talngka agitsü imlar, ta

ketdangsürtemi ashi.

Manipur police-i ashiba agi, security forces aser CRPF convoy kati lenmang merketetba nung teyari agütsüdar. Anentsüh malu tsüngda NH-37 nung tenüngdakba oset bener aliba gari 177 kecha tetsükdaksü makai odaksüogo.

Police-isa, lendong ataloktsü ta bilemba tesemtem nung security akangshiogo aser district balala nung checkpoint 110 amenoka lir, ta metetaksü.

Onoki Khamenei tepsetnüa liasü: Israel Katz

Tel Aviv, Aami/June 27 (Agencies): Israel Defence Minister Israel Katz-i ashiba agi, tawa anogo 12 raraba mapang par linüki Iran Supreme Leader Ayatollah Ali Khamenei tepsetnüa liasü.

Khamenei tepsettsü atema Israel-i United States nungi temelaba agitsü menüngdaki liasü, ta Katz-i Brehostibarnü ashi, anungji Washington-i pa tepsettsü memela ta osang sangdonga aliba den meputeper. "Onoki Khamenei tepsetnüa liasü, saka operational opportunity meliasü," ta Katz-i Israel indang Channel 13 den sensaksemba mapang ashi.

Khamenei-ia pa tepsettsü meranger ta meteta liasü aser ali telung kanga taroki alu aser Israel-i mezüng amakdang tepsetba Islamic Revolutionary Guard Corps lenir melenba commander tem den osangtsüsang magitep, ta Katz-i ashi.

Rara mapang Khamenei-i video messages saya aser pa par generals tem den tesendaktep meliasüba kuli maka.

Khamenei ya tepset asübo

rara tesashiba kumer alitsüba liasü. Pa ya Iran linük indang de facto head kisüng masü saka alima tesem balala nung Shia Muslim nunger million aika atema tanülar tsütsü temaba lir.

Israel Ato Kilonser Benjamin Netanyahu aser US Tir Donald Trump nati mapang balala nung rara ajanga yimli melentsü akok ta ashi, aser Trump-i taoba Deobarnü social media post ka nung iba rara yagi "MAKE IRAN GREAT AGAIN" akumtsü akok ta shia liasü.

US-i Fordow, Natanz aser Isfahan nung bomb pokloktsüba ajanga Iran nuclear tashi raksatsüba indang osang balala agütsütepba mapang Katz-i iba o ya ashi. Khamenei-ibo US-i amakba indang o tali saloka jembir, ta Brehostibarnü shia liasü.

Israel defence minister-i, Iran-i par nuclear sentong nung terenlokba ali ama ajitetrq ano amaktsü Trump nungi par linük nem temelaba agütsüogo, ta ashi.

"Amakba sülen Iran-i nuclear facilities yanglushitsü tensa nibo mangur," ta pai ashi.

Brehostibarnü Netanyahu-i iba rara ajanga Arab linüktem den diplomatic agreements tali atema maongka agütsür ta ashi. US-i amakba nung telangzüba agüja Iran-i Qatar indang Al Udeid Air Base nung US sepaitem alidak missile ka khaloktsü aser iba sülen US tetsüngtai ya ceasefire sangdonga rara tembang.

"Asenoki temulungtetba tulu nung Iran den raraogo aser takok tulu nguogo. Iba takok yagi peace accords asoshi lenmang tesadem lapoktsür," ta Netanyahu-i video ka ajanga Abraham Accords athishia ashi, koba ajanga 2020 küm Israel aser Arab linük kar den tesendaktep yanglu.

Iran-ia iba rara sülen takok anguba sangdonga parnoki Israel nunger nükjidong - Tehran indang nuclear aser ballistic missile sentong tem tatem kumdaktsütsüba - matalokdaktsü aser missile khalokja Israel tesem ajaklen teraksa agütsüba yong Netanyahu-i iba tashiyim amshiba tembangdaktsütet, ta ashir.

Israel den raraba sülen Iran-i nisung aika pua merenshiogo

Tehran, Aami/June 27 (Agencies): Tawa Iran aser Israel tsüngta raraba sülen Israel intelligence agencies den sendaktepa lir südi ta temulung melemi alir aika Iran ketdangsüri pua aser aika nem temerenshi agütsüogo.

Israeli agents temi Iranian security servicee rakpoka ait ta ketdangsür temi ashiba sülen iba ya ataloker.

Iba rara nung tongtipang nisung aika tepsetba nung Israel nem osangtsüsang agütsür kiasü, ta ketdangsür temi temulung melemi liasü. Item rongnung elite Islamic Revolutionary Guard Corps (IRGC) indang senior commanders aser nuclear scientists tem aika tepset, aser ibai linük telung nung Israel indang Mossad intelligence agency tenüng nung inyaker tem mapa lir ta Iran-i ashir.

Item lenirtem mezüng-mezünga tepsetba ajanga aoksar ketdangsür temi bendanger itdangiter tem den inyaker südi ta temulung melemi alirtem dak tenük you aser aser ibai national security asoshi lir ta ashi.

Ajisüaka aikati ibai Iran yimsüsür anemer ola madokdaktsütsü aser nübur azüokba nung tashi itshitsü asoshi lir ta tsübor.

Anogo 12 raraba mapang Iran ketdangsür temi Israel asoshi itdangiter ta tai tonglokja alir nisung asem tepset. Ceasefire tenzüker anogo ka dang lir Bodhbarnü nisung asem kasa taitsüba nung tepset.

Iba sülen ketdangsür temi itdangiterba asoshi linük tesem balala nungi temulung melemteti nisung noklang aika

apuba sangdongogo. Pua alir kari tai nangzükba state television nunga sayua liasü aser yangji parnoki Israel nunger itdangiter den teka amteper inyakba nangzük.

Iran nung mapang talangka nungi tashiyim amshia nangzükdaktsüba aser obendang shidak magütsüba yimyatem athishia human rights telok aser activists temi tsüboa bilemba lemsatepa liasü. Ano iba ama nisung tali merenshitsü ta arendaka bilemba lir.

Iran indang Ministry of Intelligence ajanga ashiba agi, parnoki CIA, Mossad aser MI6 densema Western aser Israeli intelligence networks anema kanga sashia raraogo.

IRGC den sendaktepa aliba Fars News Agency ajanga ashiba agi, Israel-i June 13 nü nungi Iran amak tenzüker linük telung nung Israeli spy network kanga yakyaka akum. Anogo 12 tsüngta Iranian intelligence aser security forces temi item network den sendaktepa aliba nisung 700 dak tema puogo ta Fars ajanga ashi.

Iran nunger temi BBC Persian dang Iran indang intelligence ministry ajanga parnok indang phone number tem Israel dak sendakba social

media pages nung adoka lir ta tekumdangtsü text messages yoka liasü ta ashi. Parnok dang item pages yutsütsü totuyuba agütsü aser aji meinyakra temerenshi alitsü ta ashi.

Iran sorkari bendang lima nung Persian oshi indang media outlets nung inyakba osangbener tem dang mapa yutsütsü shia liasü aser item rongnung BBC Persian aser London nung amenoka aliba Iran International and Manoto TV densema lir.

Iran International ajanga ashiba agi, IRGC ajanga Tejrán nung TV presenters ka tetsü, tebu aser tenu nungertem pua la iba channel ajanga Iran-Israel rara osang abenba nungi anentsü ajungshia liasü. Security agents ajanga ashiba ama la tebui la dang phon nungi mapa yutsütsü ajungshia liasü aser tarutsü nung timtem ajurutsü ashi.

Rara tenzükba sülen BBC Persian osangbener tem aser parnok kinungertem amokmerenba tali tesashiba akum aser parnok dang "mohareb" ta aja - tetetzü Tsüngrem anema rarar - aser Iran nunger ozüng kübok item nisungtem nem tasüba temerenshi agütsür.

(Maneni tapak 8 nung...)

LENz TRAVELS App




INNOVA aser Kia Carens, Mokokchung/Dimapur via Kohima, tsüngta senzütsü tenzükogo. LENz TRAVELS app Google play store mesüra agüja aliba QR code nungi download süa online ticket book sütetsü. App mamshitetter tem atema LENz TRAVELS Counter nungi ticket angutsü.

Contact: 8414944634

Office of the
Merangkong Senso Telongjem
Kohima : Nagaland

TENÜNGSANG AGÜTSÜR



Merangkong Senso Telongjem, Kohima ajanga Lt. Dr.T. Senlem aser Lt. Mrs. Punala Senlem na jala **Dr. Mereninla Senlem**, Department of Health and Family Welfare, Government of Nagaland nung Principal Director menden tongtetba asoshi tenüngsang aser tetushi agütsür.

Tsüngremi la wadang maneni moajangma.

Sd/-
Imnayanger
Tir, MSTK

Sd/-
K. Yanger Lkr.
Tongti Zülur, MSTK

Office of the
Chuchuyimlang Merüshiba Asotsür
Telongjem Kohima

Tenüngsang Agütsür

Asür Imnachuba jala **Tiawapangla**-i Department of Higher Education kübok Assistant Professor (English) B.Ed College nung mapa anguba atema Merüshiba Asotsür Telongjem, Kohima ajanga tenüngsang agütsür.

Tsüngremi la taküm aser wadang maneni moajangma.

Sd/-
Mrs. Alempokla
President

Sd/-
Mrs. Imkongmenla
Secretary

Office of the
LONGMISA SENSO MUNGDANG
P.O Mokokchung - 798601 B.P.O Longmisa
Mokokchung : Nagaland

TENUNGSANG AGUTSUR

Longmisa Senso Mungdang ajanga tenüngsanga **Shri.Jongpongtoishi** Additional Director Directorate of Printing & Stationery, Nagaland. Kohima jenjang ajangzüktetba asoshi konang tetushi agütsür.

Asen Teyanglur Tsüngremi nu taküm, kibong aser wadang ajak nung maneni moajangma.

Sd/-
Pangersosang
President, LSM

Sd/-
I. Senkanungba Ao
G. Secretary, LSM

Office of the
National Democratic Progressive Party (NDPP)
26 Aonglenden Assembly Constituency
Mokokchung Region
"Facta non Verba"

TENÜNGSANG AGÜTSÜR

Ungma Village nungi R. Limakumzuk-i Nagaland Building and other Construction Workers' Welfare Board nung jenjang ngutetba asoshi 26 Aonglenden Assembly Constituency - NDPP ajanga tenüngsang agütsür. Nai bendanga agütsür meranga inyakba amajok makum aser nai shilem tajung agiba atema onok pelar.

Kasa mapang onoki iba maongka agia Chief Minister Dr. Neiphiu Rio, Nagaland Legislative Assembly indang Speaker Sharingain Longkumer aser Nagaland Nationalist Democratic Progressive Party Tir Chingwang Konyak nunger dang pelaba lemsateper. Nenok lenisüba aser mangdang tajung aliba ajanga board tajungba kuma yanglushiogo.

Sd/-
Nungsangmeren
President

Sd/-
Sutsungkaba
Gen. Secretary

AITA-i Anil Dhupar melen; Iyer interim secretary general kumogo

Aami/June 27, 2025 (Agencies): All India Tennis Association (AITA) Executive Committee-i Hokolbarnü Secretary General mapa nungi Anil Dhupar aginogo. Pa arishi kum 70 ajungba aser kum pezü term tembangba sülen pai iba mapa maneni abentsü asoshi metemsü kumogo, ta ashi.

Senden nung züngsem 25 nungi 17-i shilem agi aser EC-i, three-fourths majority agi bangzüng ka agizüka interim secretary mapa abentsü atema Joint Secretary Sunder Iyer shim aser Somdev Devvarman aser Purav Raja nati Delhi High Court nung writ petition ka benokba telangzüba agütsütsü pa nem nongloktüsügo. Somdev aser nati 2024 kum September ita election agiba indang validity ashishia liasü.

Arishi kum 72 tain Dhupar ya 2020 kum, kum pezü atema shim. Taoba kum election nung pai ketdangpur mapa atema nomination file masü saka

court-i election results mesangdongba ajanga pai maneni pa mapa bendar.

"Onoki Secretary General mapa nungi Dhupar agintsü atema tanü bangzüng ka agizükogo. Onoki interim secretary asütsü Sunder Iyer shimogo. Result mesangdong tashi pai asayartem petition ajak achaayanga atatsü," ta AITA Vice President (Sports) Hironmoy Chatterjee-i PTI dang ashi.

"Executive Committee ya ajak dang temaba lir, saka tir aser Secretary General nati EC den mashishitepi telemtetba agir. Dhupar arishi kum 70 adenogo aser Sports Code dak ajemdaker pai iba mapa mebentetsü, kechiyong iba ajanga arishi kum 70 ajanga ketdangpur mapa abentsü memelar.

"AITA dak sendakba ken o tem atema obendanger shimtsü ya EC-i telemtetba agitsü nüngdaker. Tir-i telangzüba

magütsü tsüngda shinga dena ken o mashishitep. Federation ya nisung kar mulungka nung dang maotsü, iba ya democratic institution ka lir," ta kasa sangdong ajanga metetdaksü.

AITA temzüng ozüing ajanga ketdangpur ka arishi kum 70 majung dang shimra mapa maneni bendaktsütsü atema temelaba agütsür aliba indang lephsia metetdaksüba mapang Chatterjee-i, "parnoki pei mapa maneni abentsü atema temelenshi ya bener aru. Sports Code sülen anidaktsü nüngdaker aser pa kum pezü term-a temogo anungji kechiba maneni inyaktsü," ta ashi.

Senden nung EC zügsem tenet virtually shilem agi. Senden nung shilem agirtem rongnung Hironmoy Chatterjee, Chintan Parikh, Sunder Iyer, Suman Kapur, Raktim Saikia, Prem Karra, Rushmi Chakravarti, Ankush Dutta, Thomas Paul, aser Capt. Murti Gupta nunger densema liasü.

Jayden Seales dang pa indang match fees 15% senchi achi



Aami/June 27, 2025 (Agencies): West Indies nunger fast bowler Jayden Seales-i Australia den Barbados nung mezüngbuba Test asayaba mapang International Cricket Council indang code of conduct nung aibelenba atema pa indang match fee shilem 15% senchi chiogo.

Kensington Oval nung Australia captain Pat Cummins out sütsüba sülen Seales-i pa dang dressing room leni tuyua pa tugutsü len sayua liasü.

Seales inyakyim ya ICC-i Code of Conduct kübok Article 2.5 nung aibelenba ama ngutetogo, koba international asaya nung out sütsüba batter ka rongmesotsüsa jenjang agiba dak sendaka lir.

Anogo tatemi iba tatalokba indang asüngdangba mapang Seales-i ashiba agi, "ni kecha tamajung bilema maliasü aser tezüng adangba ang liasü. Pat-i ni ball aonba mapang shot tajung ka ana asaya aser ni pa dang dressing room kong ali aji sayuba dang aser kecha

tebilemba tamajung maliasü," Senchi den külemi Seales nem demerit point ka agütsüogo, koba ita 24 tsüngda pa nem demerit point tanabuba agütsüba liasü.

Seales densema West Indies nunger bowler temi World Test Championship runners-up Australia den Test asaya tananübuba ball kanga junga onogo

West Indies pur mezüngbuba innings nung run 10 agi timba liasü aser iba ya Shai Hope (48) aser captain Roston Chase (44) na senteper run 67 yangluba ajanga liasü.

Australia team second innings-a junga metenzükter aser parnoki asayar pezü out sür run 92 dang yanglua parnok run 82 agi timba lir. Seales-i Josh Inglis out süja iba asaya nung wicket trokbuba agia liasü.

Asaya tasemnübuba tenzükba mapang team anaprongla ya jenjang kasasa dang lir, aser Travis Head (13) o Beau Webster (19) na batting amentsü.

Leicester aser manager Van Nistelrooy na pilaogo

Aami/June 27, 2025 (Agencies): Leicester City pur Premier League nungi relegate asüba sülen hopta teku lir coach Ruud van Nistelrooy-i mapa toktsüogo.

Arishi kum 48 tain Dutch nunger coach lenisüba nung taoba season Leicester pur asaya 27 asaya aser iba mapang parnoki asaya pongu dang akok aser asaya 19 mekoki liasü.

Season nung asaya pongu asayatsü anunga lia Leicester pur relegat asütsü jangjar liasü, saka taoba PSV Eindhoven coach yagi season tembanga club ani aser iba sülena ita ka tashi coach mapa benogo.

Leicester City-i ashiba agi, Van Nistelrooy aser club na tangatetep nung pai coach

mapa toktsüogo.

Leicester pur kum asem tsüngda Championship nung tanabuba season atema renemshiba mapang ka lir, aser kasa mapang English Football League's financial rules nung aibelenba atema parnok taruba season nung points penalty ka achitsü akok.

Van Nistelrooy-i, club tarutsü tajungba ka asoshi imlaja ataba lemsatepogo.

Nistelrooy melena taoba mapang Everton aser Burnley caoch Sean Dyche shimtsü asoshi sendaktepa arudar.

Club ketdangsürtemi season tasen metenzük tsüngda coach tasen ka anir arutsü atema inyaktepba mapang first-team coaching staff temi Leicester

indang pre-season mapatem achaayanga atatsü. Season tasenba ya August 10 nü Sheffield den asaya-a tenzüktsü.

Van Nistelrooy-i Steve Cooper melenba mapang Leicester pur table nung 16buba nung liasü aser parnok relegation-i point ka agi dang mai liasü.

Taoba mapang Nottingham Forest caoch Cooper lenisüba nung Leicester pur season tetenzüklen mezüngbuba ita asem asaya aser iba mapang parnoki asaya 15 nungi asem akok aser tenet mekoki liasü.

Nistelrooy-i coach mapa agizükba sülen December 3 nü West Ham koka pa mapa kanga junga tenzük saka hopta asem dang lir parnok relegation zone-i ai.

Wimbledon: Alcaraz mezüngbuba round Fognini den asayatsü

Aami/June 27, 2025 (Agencies): Taküm Wimbledon nung Carlos Alcaraz mezüngbuba round Italy nunger asayar Fabio Fognini den asayatsü. Pa iba asayamung tasembuba akoktsü merangdar. Kasa mapang nung tetsürtem rongnung top seed Aryna Sabalenka mezüngbuba asaya Canada tsür qualifier Carson Branstine den asayatsü.

Iba asayamung atema Hokolbarnü All England Club nung fixture yanglua liasü, aser mezüngbuba round nung jangrademtsü asaya kar lir.

Teburtem rongnung top seed asayar Jannik Sinner, shiba iba ita French Open final nung Alcaraz-i tsükdakja liasü, pa külem Italy nunger Luca Nardi den asayatsü aser sixth seed Novak Djokovic, shiba iba asayamung tibenbuba koka Roger Federer den kasasa akümstsü merangdar, pa

mezüngbuba round nung France nunger world number 40 asayar Alexandre Muller den asayatsü.

Tetsürtem rongnung defending champion Barbora Krejčíková, shiba Brehostibarnü tebi atsüba ajanga Eastbourne asayamung nungi tugua liasü, la Philippines tsür Alexandra Eala den asayatsü.

Tetürtem rongnung second seed asayar Coco Gauff mezüngbuba round nung Ukraine tsür Dayana Yastremska den asayatsü aser Jessica Pegula Italy tsür qualifier Elisabetta Cocciaretto den asayatsü.

Fourth seed Jasmine Paolini shiba taoba kum iba asayamung nung runner-up liasü, la Ltvia tsür Anastasija Sevastova den asayatsü. Sabalenka-i asayatem koka tura la Paolini den semifinal asayatsü.

Taküm iba asayamung kija

asaya nung Britain nunger asayar 23 lir, koba 1984 kum sülen timba asütsü. Britain nunger rongnungi fourth seed Jack Draper mezüngbuba round Argentina nunger Sebastian Baez den asayatsü aser pa tanabuba round nung Croatia nunger Marin Cilic mesüra Kazakhstan' nunger Alexander Bublik den asayatsü.

Iba asayamung akoktsü atema Draper-i quarter-finals nung Djokovic aser semi nung Sinner aser final nung Alcaraz akoktsüsa akümstsü akok.

Britain tsürtem rongnungi number one asyar Emma Raducanu, mezüngbuba round nung Mingge (Mimi) Xu den asayatsü, shiba wildcard entry asayar ka lir.

Mezüngbuba round kokra la tanabuba round nung Marketa Vondrousova mesüra McCartney Kessler den asayatsü.

BENDANGLI OSANG : Tapak 7 nungi...

Israel den raraba sülen Iran-i nisung aika...

Manoto TV nung inyakera iba ama ajangshiba osang lir.

Aikati ibai sorkar anemer ola madokdaktsütsü aser bendang lima nung jenoker media nung inyakertem amokmerentsü asoshi tasa ka lir ta ashir.

Security forces temia taitüba kecha makai activists, writers aser artists aika pua lir. Ano 2022 kum "Woman, Life, Freedom" anti-government protest nung tepsetba kinunger dak tenük yoker apuba osanga lir.

Item inyaksangshi ajanga tang activists kisüing masü saka taoba mapang sorkar anema nokdaker den sendaktepa alirtem dak tenük yokba sayur.

Rara mapang Iran sorkari internet ajunga shibang aser ceasefire sülena ajakbo mamshiteter. Mepetmesü,

talisa sorkar anema linük tesem ajungalen longkak aitba mapang internet shibangtsüba ya Iran nung yimya ka ama kumogo. Iba den külemi Instagram, Telegram, X aser YouTube aser ano BBC Persian amala news websites tem Iran nung mapang talangka nungi shibangogo aser Virtual Private Network (VPN) proxy service mamshibo melapokteter.

Iran-Iraq War mapang 1980s nung Iran ketdangsür temi political opposition tem kanga sashia ajemreptsü meranga liasü.

Israel den raraba sülen international sapang nung Iran tashi mait akumba ajanga ketdangsür temi nisung aika pua merenshitsü ta aikati tsübor.

BILEMDANGANG

"Anogoshia nü temoatsü züngdangang; ajita süra na temulung süa alitsü."